

重修猗氏縣志序

丙申仲夏余自虞量移平陽郡丞拜

命後屬州邑例送輿圖志書以便攷其山川
察其形勢風俗之所尚人情之所宜隨地
設施因人發政襄盛治也而猗氏獨無有
移取之令復志板燬於康熙丁丑歲惟某
紳家尚存一帙什襲藏之將以守先待後
誠深思遠慮者也越明年七月余攝猗篆

戶
假志覽之廼知猗志輯於正德間萬厯壬子續修逮我

朝康熙癸丑邑先達太史衛君廉使王君大參郭君復增修之因語其鄉士大夫曰志者紀也千百世以上之人之心不可得而見閱諸紀載而其人其志如在目前故忠臣之志在於事君而常變弗渝孝子之志在於事親而死生一致廉吏之志潔如春

泉仁者之志溫如朝靄昆弟之志則急難
歌脊令友朋之志則同聲咏伐木或行其
志於廟廊或堅其志於廡下或樂其志於
雷澤有莘或尚其志於高山流水成都一
簾志也洞庭千樹亦志也設一旦失傳為
之子若孫者漫無攷據不幾抱怨恫於中
心乎且自康熙十二年修輯以來迄今已
四十餘年豈無忠孝節烈可嗣徽音而昭

來許者亦當采而入也願亟圖之於是鄉
大夫咸稱善遂立館設局分門別類而屬
吾友總其成規模一遵往哲凡前人論列
仍繫於各條目之後其人物諸賢小論仍
附本傳戶口田賦務綜覈精確雖費搜尋
可令人一覽而悉寧詳無畧寧愼無濫彌
月以來大綱節目粗具復會紳士於學校
互相參正訛者改之遺者增之信者存之

疑者闕之其所收皆秉公舉察無一私徇
瀹茗敲冰呵凍炙硯者又一月而告竣余
首捐金募役亟付棗梨半資紳士協力報
成今猗幸有完書而余曩者之志始遂矣
夫在邑為政在心為志猗人有猗人之志
我有我之政若不取其不絕如縷者而急
成之以發其千百世以上之潛德幽光將
何以為世之法程哉雖然余亦裝潢焉已

序
耳士貴自樹立不待文王後興世固有建
非常之事業著絕代之文章振敝起衰以
傳諸千百世之下者非斯人也歟吾則深
有望於有志之君子故弁數言於首
康熙五十六年歲次丁酉孟冬之吉

誥授奉政大夫同知平陽府事兼攝猗氏縣
印務濟寧潘鉞清聞氏撰

重修縣志序

國家之傳信莫如史郡邑之傳信莫如志而志與史實則互相表裏者也故郡邑不可一日無志猶之國家不可一日無史我

皇清一統志自康熙壬子纂修以後垂六十年中間休養生息戶口繁滋物產豐

碩人文蔚興禮樂明脩所宜增益者多
矣

今上龍飛之七年復

勅十五國徵文考獻彙纂通志以昭車書
一統之盛隨蒙各 憲臺檄行郡縣接
古續今各成志書以脩採集猗雖彈丸
黑子之地然爲河東要區三晉巖邑山

川靈秀人物權奇掌故可不脩歟昔歲
丁酉署邑事平陽司馬濟寧潘公嘗踵

舊志集名儒而編輯之適以事去官書
未克就余承乏茲土因糾集紳士理其
遺緒考訂舛訛并取丁酉以來十三年
之事附益於後凡五閱月而後成書書
成余讀之而歎曰甚矣作志之難也蓋

地係桑梓則褒美或失之濫且誣人不
土著則見聞未必其詳且確况年逾甲
子則卷宗之散佚不少父老之傳聞無
多有一於此非繁則漏斯志兼而有之
欲其簡而能該詳而能要豈不戛戛乎
難哉夫志揚善隱惡雖與史之善惡並
紀明法戒示勸懲者異體然歷世之典

章一方之土俗脩焉因革以著朝代坊
里以正經界學校以育人材卹政以捍
災患賦役定而里胥不擾兵防修而萑
苻不驚官師有表則治人得循蹟有紀
則治法傳戶口之登耗不常宜用滋培
風俗之貞淫不一宜用倡導觀形勝而
知險阨察古蹟而識興廢紀選舉以勵

絃誦溯人物以志景仰城郭增之而日
崇河渠濬之而日深孝子節婦紀不絕
書山川鬼神禮無乏祀其間利何以興
害何以除俗何以厚政何以成披文覽
籍法古籌今可以不下堂而境內治方
今各憲臨蒞茲土度式金玉操凜冰
霜上體

天子一道同風之意下厯窮簷饑溺由已
之憂修舉廢墜禁止惰窳風氣蒸蒸日上
上余濫竽一令亦惟白水盟心以期青
山無愧步諸大君子之芳塵然自顧
駑鈍惴惴焉每懼其不逮而此志之修
也惟是損益前書編綴近事偕二三同
人樂觀厥成而已若夫黜浮崇雅賡颺

休風以俟後之君子則余豈敢肯

雍正七年歲次己酉仲秋上澣之吉

賜進士出身知猗氏縣事文登宋之樹

譔

續修猗志引言

按猗志重修於

國朝康熙十二年歷時未久星野山川如故建置沿革無多古蹟今制前志考訂頗詳即偶缺畧彈丸黑子之地邑乘外無憑搜羅惟是官師選舉人物藝文迭興踵事不可無續紀以俟將來至於賦額之稍有增減學廟之隨時修葺庠碑檢冊徵信乃書唯求耳目之真弗侈鋪張之麗寧蹈不文罔敢失實自康熙十三年甲寅至四十六年丁亥起訖凡三十四年

康熙四十七年歲次戊子

勅授文林郎浙江臨安縣知縣致仕己酉解元邑人郭九會
撰

右先君子續邑乘引言也康熙戊子夏平陽太守 劉
公重修郡乘郡之鄉先生六人與焉先君子其一也先
是 劉公檄行屬邑各續新志以資彙考於時猗猶平
陽隸也邑侯崑山葉公謀之邑先達諸公而大叅晉溪
喬先生以其事推讓於先君子先君子誼不獲辭爰自